

葉常春江西人恩貢萬曆十二年任別駕真誠  
坦直民不忍欺移鎮靈山安靜威嚴狼獾歛  
跡

張應暘浙江人監生萬曆四十六年任府判廉  
平和易博大涵洪遇事有機權力除宿寇攝  
符多惠政大著賢聲卒於官上下咸惜之

施沛華亭人恩選天啟五年通判雅度長材署  
欽州事首建文廟凡里甲荅應及火耗鑿字  
悉蠲又詳革斗級計擒賊首造渡船議時務



十二條語皆切中時弊未幾丁艱去任未竟

厥施欽人立碑紀之

劉子麒儀真人舉人萬曆三年任司李誠心直

道攝郡鑒朗秋毫讞獄仁流春旭

熊廷相豐城人舉人萬曆十五年任司李清介

惟嚴引經斷獄民有淑問之謠革弊安民郡

沐清寧之化累官知府

陳文焯江西臨川人舉人萬曆二十二年任司

李廉潔性成有水壺秋月之度每鞠獄全活



甚衆迨攝郡畱心教養力行實政陞任去日  
惟携二三蒼頭載圖書數卷至今仰其高風  
汪之彥湖廣江夏人進士萬曆二十七年任司  
李明如秋月潔類冰壺每以勿喜之心幾致  
祥刑之化尋調繁去

張恩福建上杭人舉人萬曆三十七年任司李  
瑩品冰壺而有雄才宣慈萬姓飭法不撓  
沈漸學四川人舉人天啓五年任司李才優剴  
割守慎廉隅代庖有聲委盤無染



董廷欽閩縣人舉人以國子監博士萬曆十九年出守欽州甫下車諮求民瘼及利害所當興革者如興學校設義倉革攢造陋規增黃土營兵建平南浮橋種種善政三年報最陞韶州府同知循海去不用夫役士民至今思之立碑以志不忘云

王世守合州人恩選萬曆二十三年任欽州平易近人興利革弊里甲中有不經之費悉爲蠲免馬戶派養馬家增鞭草料條陳九事歲



省千金至計擒叛酋遷立學宮尤善政之大者州志蠹蝕捐金翻刻焉

王性合肥人歲貢萬曆二十六年任欽州賦性剛決不避權貴值彝賊犯境提兵冒險掃穴平之內監採珠索螺夫螺筐甚急力沮獲免曾遇富順人舉人萬曆二十五年任同知丁未冬署欽州事精明果斷剔蠹釐奸不匝月散餉之永安彝賊乘虛陷城報聞馳回賊散去驗殺傷者給與棺衾醫藥有差明年春賊復



寇遇與指揮黨弘謨協力禦之賊不敢薄城  
是冬大征兵鱗集約帥將嚴約束無有橫行  
於市者民賴安堵欽人德之立祠祀焉見碑  
記

彭名世廬陵人由舉人萬曆三十六年知欽州  
剛正不屈時值大征兵將驕悍民甚苦之名  
世力遏其焰運糧請易以兵又把總販糴私  
通海外名世徑劾按之因辭去至靈山當道  
畱返後竟告去



馬中超廣西全州人舉人萬曆四十三年任欽  
州正己率物禁差役下鄉騷擾革保長更替  
紙價時賊黃慶中標掠爲患超計招撫之又  
條陳開復西門設墟對岸重修五湖亭彷彿  
陶林二公故事惜以丁難去

陳俊廣東三水人歲貢萬曆三十三年任欽州  
學正模範端嚴器宇樂易談經藝勤訓誨士  
有屈者代伸之歲收學租等差分給又以學  
舖十間與諸生輪供文昌春秋祭臨去捐俸



房州府志  
三十金議造文昌閣于鰲魚洲以培風水惜  
守藏者乾沒弗竟厥志

吳國藩灌陽人舉人萬曆四十五年任欽州學  
正賦性端方議論侃直署州事廉明果斷興  
革鑿鑿如遷明倫堂計招賊首黃月明等尤  
其大者陞西寧知縣

李五美字尊菴黃岡人由舉人任輝縣教諭天  
啓五年擢欽州守時山寇劫掠百姓流離賦  
半逋美下車倣渤海法請罷一切告捕者設



營分兵四戍之盜遄息賦用登首葺學宮建  
文昌閣復東門子城貞節坊浚濠築堤兩年  
間州治改觀進諸生談經較藝蒐州乘以存  
文獻革火耗清滯獄府廳差役擾民痛懲之  
不避嫌怨民賴安堵丁卯歲西狼趙永烈擁  
衆據河洲公決策驅逐兩院嘉之會惠有海  
寇警以公有禦侮才題補惠郡海防四民遮  
攀不忍舍立祠勒石於文昌閣之前

陳人傑字衡靈湖廣常德人天啓五年由指揮



任欽守備溫恭冲抑重文崇儒韜畧出人意  
表時山寇猖獗廣設子營佐州籌畫身冒趙  
狼之險驅之去捐資助文昌閣人皆德之

陳聯輝字少璧德慶州人歲貢天啓七年任欽  
州學正智識淵涵襟期豁達束脩不較出金  
以貸貧士建文昌閣於鰲魚洲毅然以興起  
斯文爲任又申捐舖稅五間以供祭祀田租  
百斗給守閣香燈亦不朽之偉績也事見碑  
記以陞任去